



REPUBLIKA E SHQIPËRISË

KOMISIONERI PËR TË DREJTËN E INFORMIMIT DHE MBROJTJEN E TË DHËNAVE PERSONALE DREJTORIA E PËRGJITHSHME E TË DREJTËS PËR INFORMIM DREJTORIA E MONITORIMIT TË PROGRAMEVE TË TRANSPARENCËS

Nr. 2191/3 Prot.

Tiranë, më 28/10/2024

VENDIM

Nr. 22, datë 28.10.2024

PËR

ZBATIMIN E MASAVE ADMINISTRATIVE

Në mbështetje të nenit 23 të Kushtetutës së Republikës së Shqipërisë, shkronja i), e pikës 1, të nenit 7, nenit 8, nenit 9, pikës 1 dhe shkronjat c) dhe dh) të pikës 2, të nenit 9/1 të ligjit nr. 119/2014 “Për të drejtën e informimit” i ndryshuar,

KONSTATOVA SE:

Zyra e Komisionerit për të Drejtën e Informimit dhe Mbrojtjen e të Dhënave Personale, në përputhje me pikën 1, të nenit 9/1, të ligjit nr. 119/2014 “Për të drejtën e informimit”, i ndryshuar, (në vijim “LDI”) ku përcaktohet se: “Komisioneri për të Drejtën e Informimit dhe Mbrojtjen e të Dhënave Personale (“Komisioneri”) është autoriteti i pavarur përgjegjës për shqyrtimin e ankesave, monitorimin dhe mbikëqyrjen e zbatimit të këtij ligji”, si dhe mbështetur në shkronjën c), të pikës 2, të nenit 9/1 të LDI, si dhe në zbatim të detyrave të lëna nga rezoluta e Kuvendit të Republikës së Shqipërisë “Për Vlerësimin e Veprimtarisë së Komisionerit për të Drejtën e Informimit dhe Mbrojtjen e të Dhënave Personale për Vitin 2023”, si dhe planin vjetor të punës, ka kryer monitorimin e publikimit/përditësimit të Regjistrit të Kërkesave dhe Përgjigjeve, në faqen zyrtare të Autoritetit Publik Bashkia Dimal.

Sipas shkronjës b), të pikës 2, të nenit 10 të LDI, Koordinatori për të drejtën e informimit krijon, mban, publikon dhe përditëson Regjistrin e Kërkesave dhe Përgjigjeve brenda afatit të parashikuar në pikën 1, të nenit 8, të këtij ligji.

Në pikën 1, të nenit 8, të LDI parashikohet: “..... Ky regjistër përditësohet jo më pak se 1 (një) herë në muaj dhe publikohet në faqen e internetit të autoritetit publik, si dhe në mjediset

e pritjes së publikut në zyrat e autoritetit publik. Identiteti i kërkuesve të informacionit nuk pasqyrohet në regjistër”.

Pika 2, e nenit 8, të LDI parashikon se: *“Komisioneri për të Drejtën e Informimit dhe Mbrojtjen e të Dhënave Personale vendos standarde për formatin dhe përmbajtjen e regjistrit”.*

Në zbatim të pikës 2, të nenit 8, të LDI, Komisioneri ka miratuar formatin dhe përmbajtjen e Regjistrit të Kërkesave dhe Përgjigjeve me Urdhërin nr. 188/2020 *“Për miratimin e regjistrit të kërkesave dhe përgjigjeve, të rishikuar”.*

Bazuar në sa më sipër, Zyra e Komisionerit ka kryer monitorimin e faqes zyrtare të Autoritetit Publik Bashkia Dimal <https://bashkiadimal.gov.al/kerkese-per-informim/>, në përfundim të së cilit ka rezultuar se nuk është përmbushur detyrimi ligjor i përcaktuar në nenin 8, të LDI, për të përditësuar Regjistrin e Kërkesave dhe Përgjigjeve në faqen zyrtare të internetit të Bashkisë Dimal, sipas afateve dhe kërkesave të ligjit dhe sipas formatit dhe përmbajtjes së Urdhërit nr. 188/2020 *“Për miratimin e regjistrit të kërkesave dhe përgjigjeve, të rishikuar”.*

Referuar konstatimeve të mësipërme, Zyra e Komisionerit dërgoi pranë Autoritetit Publik shkresën nr. 2191 prot., datë 11.10.2024, *“Njoftim për konstatimin e kundravajtjes dhe fillimin e procedurës së shqyrtimit të saj”*, nëpërmjet të cilës, njoftoi konstatimin e mospërditësimit të Regjistrit të Kërkesave dhe Përgjigjeve.

Referuar pikës 2, të nenit 10, si dhe të pikës 3, të nenit 19, të LDI përgjegjësia për krijimin, mbajtjen, publikimin dhe përditësimin e Regjistrit të Kërkesave dhe Përgjigjeve, brenda afatit të parashikuar, rezulton e Koordinatorit për të Drejtën për Informim të Autoritetit Publik, znj. R. H.

Në këto kushte, me qëllim ushtrimin e të drejtës për tu dëgjuar, në përputhje me nenet 87 dhe 88 të Kodit të Procedurave Administrative, nëpërmjet shkresës nr. 2191 prot., datë 11.10.2024, drejtuar znj. R. H., duke vënë në dijeni edhe titullarin e autoritetit publik, Komisioneri njoftoi zhvillimin e një seance dëgjimore në datën 21.10.2024.

Seanca dëgjimore, sipas lajmërimit me shkresën e sipërcituar dhe sipas konfirmimit të pjesëmarrjes së znj. R. H. me e-mailin e datës 15.10.24, u zhvillua më datë 21.10.2024, pranë ambienteve të Zyrës së Komisionerit. Në këtë seancë u paraqit znj. R. H., Koordinator e së Drejtës për Informim pranë Autoritetit Publik Bashkia Dimal, e cila parashit se është dakord me konstatimet e Zyrës së Komisionerit, por Bashkia Dimal është një bashki e vogël dhe ka mungesa në burime njerëzore, të cilat kanë shkaktuar mospërditësimin e Regjistrit të Kërkesave dhe Përgjigjeve në faqen zyrtare të saj. Gjatë mbajtjes së seancës u krye verifikim online, dokumentuar nëpërmjet *videoscreen* ku rezultoi se regjistri nuk hapej, fakt i cili iu vu në dukje dhe u pranua nga znj. R. H. gjatë seancës. Gjatë seancës dorëzoi regjistrin fizik dhe me e-mail të datës 22.10.2024 është njoftuar hedhja e Regjistrit 2024, por ky regjistër nuk përmbush detyrimet e kërkesave dhe formatit të LDI dhe Urdhrit nr. 188/2020 të Komisionerit, lidhur me Regjistrin e Kërkesave dhe Përgjigjeve.

Po ashtu, deri në datën e nxjerrjes së këtij vendimi, rezulton se Koordinatori i së Drejtës për Informim nuk ka bërë publikimin/përditësimin, sipas afateve dhe formatit të kërkesave të LDI dhe Urdhrit nr. 188/2020 të Komisionerit, të Regjistrit të Kërkesave dhe Përgjigjeve.

E drejta për informim është një e drejtë e sanksionuar në Kushtetutën e Republikës së Shqipërisë, e cila parashikon të drejtën e qytetarëve për të pasur akses në dokumentet zyrtare dhe detyrimin e autoriteteve publike për të përmbushur këtë të drejtë. Regjistri i Kërkesave dhe Përgjigjeve përfaqëson një ndër instrumentet kryesore të promovimit të transparencës së autoriteteve publike dhe garantimit të së drejtës për informim të publikut.

Nga monitorimi i zhvilluar nga Zyra e Komisionerit dhe shqyrtimi administrativ më pas, rezultoi se Koordinatori për të Drejtën për Informim pranë Autoritetit Publik, znj. R. H. nuk e ka përmbushur detyrimin ligjor, si dhe argumentet apo provat e paraqitura janë të pamjaftueshme për të arsyetuar mospërmbushjen dhe mosrespektimin e dispozitave të LDI dhe Urdhërit nr. 188/2020 të Komisionerit.

Pika 1, e nenit 18 të LDI, parashikon se: *“Mosrespektimi i dispozitave të këtij ligji passjell përgjegjësi administrative, sipas rasteve të parashikuara në pikën 2 të këtij neni”*.

Ndërsa në shkronjën d), të pikës 2, të nenit 18, të LDI parashikohet se: *“moskrijimi, mosmbajtja, mospublikimi apo mospërditësimi i Regjistrit të Kërkesave dhe Përgjigjeve, brenda afatit të parashikuar në pikën 1, të nenit 8, të këtij ligji, dënohet me 25 000 deri në 100 000 lekë”*.

Në pikën 3, të nenit 19 të LDI, parashikohet se: *“Koordinatori për të drejtën e informimit ka përgjegjësi administrative për shkeljet administrative të parashikuara në shkronjat “d” dhe “e” të pikës 2 të nenit 18 të këtij ligji”*.

Në përfundim, bazuar në provat dhe konstatimet, që rezultuan nga monitorimi dhe shqyrtimi administrativ i zhvilluar, Komisioneri vlerëson se është shkelur detyrimi për të përditësuar Regjistrin e Kërkesave dhe Përgjigjeve në faqen zyrtare të internetit të Bashkisë Dimal, sipas afateve dhe kërkesave të LDI dhe sipas formatit dhe përmbajtjes së Urdhërit nr. 188/2020 *“Për miratimin e regjistrit të kërkesave dhe përgjigjeve, të rishikuar”*, mosveprim që konsiderohet kundërvajtje administrative dhe dënohet me gjobë në përputhje me shkronjën d), të pikës 2 të nenit 18 të LDI.

PËR KËTO ARSYE:

Bazuar në shkronjën dh), të pikës 2, të nenit 9/1, të shkronjës d), të pikës 2, të nenit 18, pikën 3, të nenit 19, pikat 1 dhe 2 të nenit 21, nenin 22 dhe 23 të ligjit 119/2014 *“Për të drejtën e informimit”*, të ndryshuar, ligjit nr. 10279, datë 20.05.2010 *“Për kundërvajtjet administrative”* dhe shkronjën b), të pikës 1, të nenit 18 të ligjit nr. 49/2012 *“Për organizimin dhe funksionimin e gjykatave administrative dhe gjykimin e mosmarrëveshjeve administrative”*, i ndryshuar,

V E N D O S A:

1. Koordinatorin për të drejtën për informim pranë Autoritetit Publik Bashkia Dimal, në përmbushje të detyrimeve të shkronjës b), të pikës 2, të nenit 10 dhe në zbatim të pikës 1, të nenit 8 ligjit nr. 119/2014 “Për të drejtën e informimit”, të ndryshuar, të krijojë, mbajë, bëjë publik dhe përditësojë Regjistrin e Kërkesave dhe Përgjigjeve, sipas Urdhërit nr. 188/2020 “Për miratimin e regjistrit të kërkesave dhe përgjigjeve, të rishikuar”, të Komisionerit për të Drejtën e Informimit dhe Mbrojtjen e të Dhënave Personale, brenda datës 15.11.2024.
2. Dënimin e znj. R. H., Koordinatore për të Drejtën e Informimit të Autoritetit Publik Bashkia Dimal, në cilësinë e personit përgjegjës, me gjobë në vlerën 25.000 (njëzet e pesë mijë) lekë.
3. Masa e dënimit me gjobë, shlyhet me këste mujore. Gjoha ekzekutohet nga zyra e financës së Autoritetit Publik Bashkia Dimal, brenda 6 muajve nga data e njoftimit të vendimit.
4. Kundër vendimmarrjes në pikën 1, Autoriteti Publik ka të drejtën e ankimit brenda 45 ditëve në Gjykatën Administrative të Shkallës së Parë, Tiranë, sipas nenit 18 të ligjit “Për gjykatat administrative dhe gjykimin e mosmarrëveshjeve administrative” të ndryshuar, si dhe nenit 25 të ligjit nr. 119/2014 “Për të drejtën e informimit”, të ndryshuar.
5. Kundër vendimmarrjes në pikën 2, bazuar në nenin 22 të ligjit nr. 119/2014 “Për të drejtën e informimit”, të ndryshuar, personi ndaj të cilit është vendosur sanksioni administrativ, ka të drejtë brenda 30 ditëve kalendarike nga data e marrjes së njoftimit të vendimit të bëjë ankim në gjykatë në përputhje me ligjin nr. 10279, datë 20.05.2010 “Për kundërvajtjet administrative”.

Ky vendim u shpall sot në datë 28.10.2024.

KOMISIONERI

Besnik Dervishi